

Novi ministri u Vijeću ministara BiH?



Nakon što su u ponedjeljak čelnici SNSD-a, SDA i HDZ-a BiH potpisali sporazum, odnosno principe kojima se obavezuju da u roku od 30 dana bude formirano Vijeće ministara, već su počele špekulacije ko bi mogao da zauzme koju fotelju u novom sazivu Vijeća ministara BiH.

Prema dogovoru koji su postigli čelnici, SNSD-u, osim mjesta predsjedavajućeg Vijeća ministara, pripadaju ministarstva vanjske trgovine i ekonomskih odnosa, komunikacija i transporta te ljudskih prava i izbjeglica.

SDA i partnerima ove stranke pripadaju resori vanjskih poslova, sigurnosti i odbrane, a HDZ BiH je dobio finansije i trezor, civilne poslove i pravdu.

Kako nezvanično saznajemo, Dodik je nakon potpisivanja sporazuma rekao da kandidat za prvog čovjeka Vijeća ministara treba biti osoba koja je ranije spominjana, što znači da bi to trebao biti Zoran Tegeltija, bivši ministar finansija Republike Srpske i aktuelni poslanik SNSD-a u Narodnoj skupštini RS.

Kada je riječ o Ministarstvu vanjskih poslova, to je mjesto rezervisano za SDA, a kao nasljednik Igora Crnatka, najčešće se spominje ime Denisa Zvizdića. Međutim, čini se kako on nije baš zainteresiran za tu funkciju te se spominje i ime Bisere Turković.

Ministar sigurnosti skoro je izvjesno da će biti Fahrudin Radončić, čelnik SBB-a, koji je već jednom i obnašao ovu funkciju. On bi tako trebao zamijeniti SDS-ov kadar Dragana Mektića, koji će svoju političku karijeru nastaviti kao poslanik te stranke u Parlamentu BiH. Ministarstvo odbrane trebalo bi da preuzme Demokratska fronta, a ta pozicija, kako se spekuliše, bit će dodijeljena Sifetu Podžiću, koji će sjesti u fotelju umjesto Marine Pendeš.

Vjekoslav Bevanda, kadar HDZ-a BiH, trebao bi biti novi – stari ministar finansija i trezora BiH.

Resor pravde bi, kako se špekuliše, trebao opet voditi aktuelni ministar Josip Grubeša, ali nije isključena ni mogućnost da se na tu poziciju vrati hrvatski delegat u Domu naroda BiH Bariša Čolak, koji je tu funkciju već dva puta obnašao.

Zasad najbliži fotelji ministra vanjske trgovine i ekonomskih odnosa je, kako se špekuliše, poslanik SNSD-a u Predstavničkom domu BiH, Staša Košarac, koji bi tako zamijenio Mirka Šarovića.

Još se ne zna ko će zasjesti u fotelje ministara komunikacija i prometa, koja je namijenjena kadru SNSD-a, zatim u fotelju ministra za ljudska prava i izbjeglice koja je rezervisana za narod iz reda Ostalih, ali će ga delegirati SNSD, te je nepoznanica i kome će pripasti funkcija ministra civilnih poslova. Ova ministarstva su do sada vodili Saša Dalipagić, Semiha Borovac i Adil Osmanović.

Date: 07-08-2019